

Na osnovu člana 16.stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10), na prijedlog Ministarstva za prostorno uređenje, promet i komunikacije i zaštitu okoline, Vlada Zeničko-dobojskog kantona, na 21. sjednici, održanoj dana 18.09.2019.godine, d o n o s i

ZAKLJUČAK

I.

Prihvata se Mišljenje Ministarstva za prostorno uređenje, promet i komunikacije i zaštitu okoline po inicijativi poslanika Rifata Delića, koja se odnosi na osnivanje Kantonalnog preduzeća “Park prirode Tajan” i izmjene i dopune Zakona o proglašenju Spomenika prirode “Tajan” (“Službene novine Zeničko-dobojskog kantona”, broj: 3/08) i čini sastavni dio ovog zaključka.

II.

Zaključak sa Mišljenjem Ministarstva za prostorno uređenje, promet i komunikacije i zaštitu okoline broj: 12-23-9005-1/19 od 10.09.2019. godine upućuje se u dalju skupštinsku proceduru.

III.

Zaključak stupa na snagu danom donošenja.

Broj: 02-_____/19
Datum, 18.09.2019. godine
Z e n i c a

PREMIJER
po ovlaštenju

Mirnes Bašić

DOSTAVLJENO:

1x Ministarstvo za prostorno uređenje,
promet i komunikacije i zaštitu okoline,
1x Stručna služba Skupštine,
1x a/a



Broj:12-23-9005-1/19
Zenica, 10.09.2019.godine

U skladu sa članom 111. i 112. Poslovnika Skupštine Zeničko-dobojskog kantona («Službene novine Zeničko-dobojskog kantona», broj: 7/12 i 12/13, 7/18), aktom Vlade Zeničko-dobojskog kantona broj: 02-1-02-9005-1/19 od 31.05.2019. godine i aktom Skupštine Zeničko-dobojskog kantona broj: 01-02-9005-1/19 od 28.08.2019. godine, Ministarstvo za prostorno uređenje, promet i komunikacije i zaštitu okoline daje sljedeće:

MIŠLJENJE

Na 9. sjednici Skupštine Zeničko-dobojskog kantona održanoj 27.05.2019. godine, poslanik Rifat Delić je pokrenuo inicijativu za osnivanje Kantonalnog preduzeća "Park prirode Tajan" i izmjene i dopune Zakona o proglašenju Spomenika prirode "Tajan" ("Službene novine Zeničko-dobojskog kantona" broj: 3/08).

U obrazloženju inicijative poslanik Rifat Delić ističe potrebu za izmjenama i dopunama Zakona o proglašenju Spomenika prirode Tajan u smislu da je potrebno formirati novo kantonalno javno preduzeće koje će upravljati Spomenikom prirode Tajan.

Poslanik takođe navodi da Vlada Zeničko-dobojskog kantona nije osnovala javno preduzeće za upravljanje parkom prirode "Tajan", nego je isto povjerila Javnom preduzeću "Šumsko privredno društvo Zeničko-dobojskog kantona" d.o.o. Zavidovići.

Poslanik ističe da je evidentan sukob nadležnosti jer se isprepliću uticaji dva ministarstva (Ministarstvo za poljoprivredu, vodoprivredu i šumarstvo koje i upravlja Parkom prirode i Ministarstvo za promet i komunikacije i zaštitu okoliša koje je kreiralo Zakon).

U daljem obrazloženju inicijative navodi da se upravljanje zaštićenim područjima provodi na osnovu Plana upravljanja koje donosi Vlada Zeničko-dobojskog kantona na period od deset godina, kao i da je prvih deset godina isteklo, u toku kojih gazdovanje Javnog preduzeća ŠPD Zeničko-dobojskog kantona nije dalo željene i očekivane rezultate.

Ministarstvo za prostorno uređenje, promet i komunikacije i zaštitu okoline navedenu inicijativu smatra neopravdanom i odbija je iz sljedećih razloga:

Zakon o proglašenju Spomenika prirode "Tajan" donešen je u skladu sa članom 30. Zakona o zaštiti prirode ("Službene novine Federacije BiH" broj:33/03), a u fazi donošenja Zakona o proglašenju Spomenika prirode "Tajan" provedena je široka javna rasprava u kojoj su učestvovali, prije svega, općine Zavidovići i Kakanj, Turistička zajednica Zeničko-dobojskog kantona, Javno preduzeće "Šumsko privredno društvo Zeničko-dobojskog kantona" d.o.o. Zavidovići, lovačka i ribolovačka udruženja, nevladine organizacije koje se bave zaštitom prirode i okoliša itd.

U ponuđenoj radnoj verziji Zakona nalazio se i prijedlog o formiranju javnih preduzeća u općinama Zavidovići i Kakanj, koja bi upravljala Spomenikom prirode "Tajan". Ova ideja je u raspravama odbačena sa obrazloženjem neekonomičnosti formiranja novih javnih preduzeća, ali prije svega zbog sukoba nadležnosti koje bi izazvalo formiranje novog javnog preduzeća koje bi upravljalo područjem površine 4.948.35 ha kojim već upravlja JP ŠPD ZDK.

U raspravama je bilo i drugih ideja kao npr. da Spomenikom prirode Tajan upravlja Turistička zajednica Zeničko-dobojskog kantona itd.

Konačan rezultat javne rasprave i stav Vlade i Skupštine Zeničko-dobojskog kantona je bio da upravitelj spomenikom prirode "Tajan" bude Javno preduzeće "Šumsko privredno društvo Zeničko-dobojskog kantona" d.o.o. Zavidovići koje će formirati posebnu organizacionu jedinicu koja će upravljati Spomenikom prirode "Tajan".

U fazi pokretanja inicijative, od strane poslanika Rifata Delića, nije izvršena procjena sredstava potrebnih za formiranje novog javnog preduzeća. Formiranje novog javnog preduzeća, iziskivalo bi i nova opterećenja Budžeta Zeničko-dobojskog kantona, kao i potrebu iznalaženja sredstava, tako da Ministarstvo za prostorno uređenje, promet i komunikacije i zaštitu okoline ne bi imalo osnova za pribavljanje izjave o fiskalnoj procjeni.

Osim toga postavljaju se mnoga druga pitanja kao što su:

- Šta je sa sječivim etatom na području Spomenika prirode Tajan?
- Koji su ekonomski pokazatelji i koliko radnih mjesta bi se izgubilo u šumarstvu i drvopredivačkim kapacitetima?
- Ko će vršiti održavanje šuma i praćenje poremećaja nastalih usljed uticaja štetnih biotičkih i abiotičkih agenasa itd. ?

Članom 151. Zakona o zaštiti prirode ("Službene novine Federacije BiH" broj:66/13), propisano je da zaštićenim područjima i drugim zaštićenim prirodnim vrijednostima upravljaju javna preduzeća i javne ustanove. Spomenikom prirode Tajan upravlja Javno preduzeće "Šumsko privredno društvo Zeničko-dobojskog kantona" d.o.o. Zavidovići, To znači da je upravljanje zaštićenim područjem u potpunosti usklađeno sa odredbama Zakona o zaštiti prirode ("Službene novine Federacije BiH" broj:66/13).

Iako stoji konstatacija da u prethodnih deset godina nisu postignuti željeni i očekivani rezultati, formiranje novog javnog preduzeća bi izazvalo sukobe nadležnosti po pitanju upravljanja dijelovima zaštićenog područja na teritoriji općina Kakanj i Zavidovići, a također bi izazvalo i nova opterećenja Budžeta Zeničko-dobojskog kantona.

Iz svega navedenog proizilazi da se u ovoj fazi inicijativa poslanika Rifata Delića ne može prihvatiti i realizirati.

Dostavljeno:

2 x Stručna služba Vlade kantona

n/r premijera, n/r sekretara

1 x a/a



MINISTAR

Arnel Isak